

LÂWRKHAWM

SYNOD OFFICE KAI HUN

March–August, 2023 chhûnga Synod Office kai hun chu zing dâr 9:30 aţanga tlai dâr 5:00 a ni ang.

CHAMPHAI BETHEL BIAL PASTOR TUR RUAT

OM 4:21 of 17.2.2023 chuan March–December, 2023 chhûnga Champhai Bethel Pastor Bial vawng tûrin Rev. Dr Rualthankhûma a ruat a, ni 5.3.2023 khân induction hun hman a ni.

BIAL VAWNG TUR PASTOR PENSION RUAT

Synod 2022 Gen. 15-na bawh-zuiin OM 1:4 of 12.12.2022 chuan hetiang hian Bial vawng tûrin Pastor pension tawh mi pali a ruat –

Bûkpui Pastor Bialah Rev. R. Lalchangeliana; Khawhai South Pastor Bialah Rev. Biaksailova; Khawzâwl Vêngthar Pastor Bialah Rev. R. Lalnuntluanga; Lawngtlai Chanmari Pastor Bialah Rev. R.S. Rokima. Hei bâkah hian Rev. J.C. Lalramliana, Calcutta Field Secretary chu Serampore Bial lo hmui tûra ruat a ni bawh.

Hêng Bial pangate hi a vawngtu tûra Synod 2022-in a ruatten an zir zawh hma (April 2023) lo vawng tûra ruat an ni a. Pastor pension-te hian ni 15.5.2023 hmain an bial vawn hi an chhuahsan ang.

SYNOD EXECUTIVE COMMITTEE 301-NA A THU

Mizoram Synod hnuaiia committee sâng ber, Synod Executive Committee vawi 301-na chu February ni 21–23, 2023 chhûng khân J.M. Lloyd Hall, Synod Office, Aizâwlah a thu a, member 151-ah 137 an kal. SEC vawi 301-na hi Rev. Dr C. Chawngmingliana, Synod Moderator-in a kaihruai a. Upa B. Lalhmunliana, Synod Secretary (Sr) leh Rev. V.L. Luaia Hranleh, Finance Officer-ten report an pe bawh.

Thurêl pawimawh thenkhat han târ lang ila:

1. Senate of Serampore College-in Senate Fund pe ve tûra Aizâwl Theological College a rawn dîlna chu, ATC hmingin chêng nuai nhii pêk rem tih a ni.

2. KAPC nêna thawh hona term a lo tâwp tâk avângin KAPC nêna thawh hona siam chu tha tih a ni a. Partnership Committee-in a tûl anga a lo bawhzui tûra rêl a ni.

3. Mizoram Christian College (MCC) Building sakna tûr plan and estimate, Synod Trust-in a rawn siam, chêng nuai 5,918 hmanna tûr chu pawm a ni a. Trust Committee-in bawhzui ngai apiang chu lo bawhzui rawh se, tia rêl a ni.

4. Mizoram sawrkârin Mizoram New Capital Complex-a kum 25 chhûng atân ram min pêkah quarters sak rêl a ni a, Synod Trust-in a tûl anga a bawhzui atân dah a ni.

5. Synod vawi 100-na, kum 2023-a hman tûr min rawn hmanpui tûrin Rev. Aneurin Owen, PC Wales Moderator (Rev. O.W. Owen-a fapa Zolâwma) leh Rev. Nan Wyn Powell-Davies, General Secretary, PC Wales-te sâwm ni se tih a ni.

6. Bangalore hmuna ram lei tûr zawn chungchânga hma lâkna chu, zawn chhunzawm zêl ni se, tia rêl a ni.

7. Mizoram Presbyterian Kohhran Hmeichhe Inkhâwmpui Lian Chairman (2023–2025) atân Pi Zothanpâri, Khatla

chu thlan a ni a. Tin, Pi H. Lalfakmawii, Co-ordinator i/c Kohhran Hmeichhia chu kum 2023–2025 chhûnga General Secretary atân ruat a ni bawh.

8. Serampore College Faculty Library tihchangtlun nân Synod hmingin chêng nuai 6 pêk rem tih a ni.

9. Synod compound – Moderator Bangla leh Banglapui panna kawngte hi sawrkâr hnik lovin Synod suma siam rem tih a ni a. Kum 2024–2025 budget-ah dahin, Trust-in a tûl anga a lo bawhzui tûra dah a ni.

10. Kum 2028 hian Synod Hospital chuan kum 100 a lo tling dâwn ta a. Hospital Building atân in (Building) sak tha tih a ni a, Synod Trust-in a tûl angin lo bawhzui se, tia rêl a ni.

11. Synod 2022 Gen. 35-na, Mizorama cancer a lo tlem theihna tûra hma lâk rawtna, SEC bawhzui tûra rêl chu – SEC chuan awareness campaign neih a rêl a, Synod Hospital Board bawhzui tûra dah a ni.

12. Synod 2022 Gen. 32-nain politics siam tha tûra hma lâk rawtna, SEC bawhzui tûra a rêl chu, Social Front Committee-in a tûl angin lo bawhzui rawh se, tia rêl a ni.

13. Synod 2022 Gen. 27-nain Tûmkau Ni chawhma inkhâwm hi Tûmkau Ni programme-a hman a rêl bawhzuiin, kum 2024 aţanga hman tan tûrin Worship Committee leh Sunday School Com-

(Phêk 2-naah chhunzawm a ni)

SYNOD Newsletter

EDITORIAL STAFF

Rev. Lalbiaknia

Rev. V.L. Luaia Hranleh

Upa K. Lalnginglova

Zohmingliana Colney



INKAIHHRUAINA DAN

Kan kohhran hian inkaihhruaina dân chi hrang hrang kan nei a, chûng chu hriat a pawimawh ang bawkin a hman chhuah dân a pawimawh hle baw. Inkaihhruaina dân kan neihte hi zâwm tlâng ila a duhawm khawp mai.

Pathian Biak Inkhâwm Hruaina Bu-ah hian chanvo neitu hrang hrangte hriat tûr leh zawm tlân tûr chipchiar takin târ lan a ni a. Inkhâwm hruaitu emaw, thuhriatu emaw, thupui hawngtu emaw zîngah inkaihhruaina hre lo emaw, zâwm lo emaw an awm ve fo. Zâwmin zui tlâng ila a duhawm hle. PCI Dân Bu te, Pastoral Ministry Kaihhruaina te, Nupa Chungchâng Dân Bu te, Synod Sum Vawn Dân bu te hi zir chian a tûl zualin a hriat baw.

Kohhran tinah rawngbâwltu eng emaw zât kan awm vek a. Mi mal ngaiht dân te, tha tih zâwng te, duh dân te hi a inang lo thei hle. Chuvângin, kohhran chuan kohhrante zawm tlân tûr inkaihhruaina chu inkhâwmpui emaw, committee rorêl hmangin emaw a siam a. Chu chu zâwm tlâng ila, a tha ber zêl a ni. Kan inkaihhruaina dânte hi ngun takin zir ila, i zui tlâng zêl ang u.

(Phêk 1-na chhonzawmna)

mittee-ten inbe râwnin lo buatsaih rawh se, tia rêl a ni.

14. Mizoramin land reform leh land ceiling a neih nâna Synod-in hma lâk rawtna, Synod 2022 Gen. 26-in a pawm chu, Synod Social Front Committee-in a tûl angin lo bawhzui rawh se, tia rêl a ni.

15. Synod 2022-in en thât tûra a rêl – PRESCOM dinhmun, Synod Hospital (Durtlâng) dinhmun leh Nupa Chungchâng Dânte chu en thatu tûr ruat a ni.

SYNOD CHHAWMDAWLNA

Tûn hnaia harsatna hrang hrang tâwkte hnênah Synod Relief Fund aţangin hetiang hian chhawmdâwl na pawisa pêk a ni:

Khua	Pêk chhan	Chhûngkaw zât	Pêk zât	Khua	Pêk chhan	Chhûngkaw zât	Pêk zât
Zêmabâwk S	Damlo	2	16,000	Sailâm Vêng	Damlo	1	8,000
Mualkhang	In kâng	1	10,000	Zêmabâwk S&E	Damlo	4	32,000
Zêmabâwk East	Damlo	1	8,000	Hrianghmun	Damlo	1	8,000
Zêmabâwk North	Damlo	1	8,000	Nâlzâwl	Damlo	1	8,000
Khawpuar	Damlo	1	8,000	Ngopa Chhim Vêng	In kâng	1	8,000
Khawzâwl Vêngsâng	Damlo	1	8,000	Ngopa North	Damlo	1	8,000
Khawhnai	Khawsak harsa	1	8,000	Khawlian	Damlo	1	8,000
Zêmabâwk North	Kângmei tuar	10	70,000	Kânhmun	In kâng	1	6,000
Bualpui	Accident	1	20,000	Teikhang	Vânduaina tâwk	5	48,000
Chawngtlai	Damlo	2	16,000	Tualpui	Damlo	3	24,000
Khawzâwl Hermon Vêng	In kâng	2	12,000	Kânhmun	Vânduaina tâwk	1	10,000
Nausêl	In chhia	1	10,000	Chhiahtlâng Vênghlun	Damlo	1	8,000
Champhai				Sairâng Dinthar	Damlo	1	8,000
Hospital Vêng	Damlo	1	8,000	Khâmráng	Damlo	1	8,000
Rângvamuai	Damlo	1	8,000	Thinglian	In kâng	1	10,000
Lunglêng-l	Damlo	1	8,000	Biate	Damlo	1	8,000
Thênzâwl				Mîmbung	Damlo	1	8,000
Field Vêng	Damlo	1	8,000	Suangpuiâwn N	In kâng	1	10,000
Thênzâwl				Sérchhîp Bethel	In kâng	1	8,000
Chhim Vêng	Damlo	1	8,000	Bangalore	Damlo	1	8,000
Luangpâwn	Damlo	1	8,000	Dârlâk	Damlo	1	8,000
Sairâng Dinthar	Damlo	1	8,000	Zêmabâwk Berawlui	Damlo	1	8,000
Hlimen Vêngthar	Damlo	1	8,000	Suangpuiâwn N	Damlo	1	8,000
Buhkângkâwn	Damlo	1	8,000				
Khawhai South	Damlo	1	8,000				
Airfield	Kângmei tuar	2	28,000				
Rabung Vêngthlang	Harsa	2	16,000				

Chhimtâwp Presbytery huam chhûng hmun hrang hranga Bangladesh aţanga râltlânte hnêna sem tûrin ₹5,00,000/- pek a ni baw.

PATHIAN THU ZIR DUH TAN

Presbyterian Bible School, Mission Vêng, Aizâwlah Certificate in Theology (C.Th.) admission hawn a ni a. Dîl duh tân a hnuaia târ lan hi hriat tûr a ni e:

Admission Form : Office hun chhungin ₹10/-a lei theih a ni.

Dil hun chhûng : Ni 24.4.2023 (Thawhtanni) tlai dar 3 thleng

Dil thei chin : Class VII pass, kum 16 chin, kohhran dân chhûnga awm

Interview : Ni 28.4.2023 (Zirtâwpni) chawhma dâr 10

Class tan hun : Ni 3.5.2023 (Nilaini)

Zir hun chhûng : May–August, 2023

Hre Chiang duh tân Phone No. 82960 35491 leh 98623 22112-ahte zawh fiah theih a ni.

Rev. Lalrinsânga

Principal

Presbyterian Bible School

Râl Vêngtu

SYNOD HOSPITAL, DURTLÂNG THILPÊK DAWNTE

(January 2023)

Mi thahnem tak hi Râl Vêngtu awmna hrûl kawngpuiah hian engthâwl takin an lo kal a, an hlim hle a. An zînga pakhat chuan a thiante hnênah, “En teh u, Râl Vêngtu khian face mask (Hmui tuamna) a la vuah ka ti. Covid hripui lêng a reh tawh si a, engtizia nge ni ang aw?” tiin a thiante chu a kawhhmuh a.

Mite chuan, “Râl Vêngtu, engtizia nge Covid hri lêng a reh tawh hnua face mask i la vuah reng le? A chhan min hrih thei em?” an ti a.

Râl Vêngtu chuan, “Covid hripui a reh tawh tih chu ka hria e. Hri dang a lêng zui a, hlauhawm tak a ni. Chu vâng chuan face mask ka la vuah ta reng a nih hi. Chu hri lêng chu in hre lo va, in engthâwl mai mai a nih kha. In fîmkhur loh chuan in tuar fe dâwn a ni,” a ti a.

Mite chuan, “Eng hri nge tâna lêng chu aw? Mi thiamte leh W.H.O. lam pawhin hri lêng dang an sawi si lo va,” tiin an zâwt leh a.

Râl Vêngtu chuan, “Covid hri lêng kian hnua hri dang lo lêng hi khawvêl mi thiamten a hlauhawmzia an hre thiam lo, thlarau lama thawk a nih avângin. Chûng hri lêng chu – inkhâwm peih lohna hri te, hlimhlawp ngainatna hri te, thutak hnuchhawna thawnthu lam ngainatna hri te, sum ngainatna hri te, mahni hmasialna hri te a ni a. Bible chuan **Laodikei Hripui** tiin a sawi,” a ti ta a.

Mite chuan, “Fîmkhur nachâng pawh kan lo hre tawh hlei nê. Kan face mask te pawh kan lo paih vek tawh si a, chûng hri tha lote chu kan kai ang tih a va hlauhawm ve le!” an ti a.

Râl Vêngtu chuan, “A ni rêng asin. Kha in zînga thenkhat chuan **Laodikei hri** (Thup 3:14–22) in vei tawh a nih kha. Invêng fîmkhur hle rawh u,” a ti a.

Mite chu mak ti takin an inen a, hlauthâwng takin an tlân haw ta a.

I. CHARITY FUND

1. Pi Lalremi, Zêmbâwk N, Aizâwl	₹2,500
2. Isaac Lalrinawma, V.M. Hardware, Bâwngkâwn	₹20,000
3. Thangmingliani, Durtlâng North	₹2,000
4. Pu Zodinliana, Mission Vêng	₹2,000
5. Dr Lalmalsâwma Nghâka, President, Mizoram Youth Congress	₹5,000
6. MD&D Enterprise Peter's Street, Khatla	₹30,000
7. Dr L. Ringluaia Group Derhkentlâng Awlmpik	₹2,110
8. Vângtlâng Kohhran	₹8,000
9. Vaivakâwn Vêngthlang Kohhran Pavalai Pâwl	₹20,000
10. Mualpui Bethel Kohhran	₹27,000
11. Dâwrpui Pastor Bial Kohhran Hmeichhia (Platinum Jubilee pual)	₹21,000
12. KTP, Chhingchhîp Mualpui Pastor Bial	₹10,000
13. Youth Adventure Club Mission Vêng	₹21,000
14. Best Friend, Chhînga Vêng	₹4,500
15. KTP, Khawzâwl Vêngthar Branch	₹20,000
16. Synod Hospital Staff (Christmas Charity Fund thawh khâwm)	₹1,16,000
Total	₹3,11,110

II. THISEN PETUTE

	Unit zât
1. KÏP, Tlangnuam South Branch, Aizâwl	30
2. KÏP, Sihhmui Branch	26
3. KÏP, Saikhamakâwn Branch	37
4. KÏP, Dinthar Vêngthlang Branch	37
5. Aizâwl Theological College	49

III. THIL DANG PETUTE

1. Pu Lalhualhima & Family, Zolian Motors, Ramhlun N – K Ward tân leilâwn, cushion 3 leh sana lian 3.
2. Pi Betty Lalthantluangi, Mission Vêng – A pasal tuamna puan 10.
3. Dr Lalchhanhima Râlte, MPH, Synod Hospital – NCB Ward tân Refrigerator 3.
4. KÏP, Hmuntha Bial – Thutthlêngsei panga.
5. Zorem Bakery, Durtlâng North – Damlote ei tûr chhang (₹8,700/- man hu).

LAWM THU SAWINA : Hospital mamawh chi hrang hrang, sum leh pai te, thisen te leh thilpêk dang min petu zawng zawng chungah kan Lalpa Isua Krista hmingin lâwm thu kan sawi e. Pathian malsâwmna a lêt tam takin lo dawng theuh ang che u. Tin, thilpêk pe duh kan awm chuan hospital hotute phone number kan rawn târ lanah hian biak theih reng a ni e. Chûngte chu: Director – 94361 54365 leh Nursing Superintendent – 87298 58633.

Rev. R. Lalvulluaia

Chaplain, Synod Hospital, Durtlâng.

MSSU: Sunday School zirtîrtu training pein ni 17.2.2023 (Zirtâwpni) zân khân **Model Vêng Kohhranah** Pu Lalhmunzauva Tlau, Asst. Co-ordinator leh Upa Hrilthansânga, Trainer-te an kal a.

Ni 18.2.2023 (Inrinni) khân MSSU Trainer-te hetiang hian an kal baw a – **Siaha Bialah** Upa Zomuana Râlte, Upa Zohmangaiha leh Upa K. Vânlalngâka; **Kulikâwn West Kohhranah** Pu H.K. Hmingthanzuala, Upa Chawngkhûma Chawngthu leh Upa Lalrosânga Kâwni; **Zêmbâwk South Kohhranah** Upa R. Lalmuanpuia leh Upa C. Lalbiaksânga.

Ni 25.2.2023 khân **Phunchawng Kohhranah** Pi Lalpianthangi Hrahsêl, Co-ordinator leh Upa K. Zoremsânga, Trainer; **Vaivakâwn Vêngthlang Kohhranah** Pu Lalhmunzauva Tlau, Asst. Co-ordinator leh trainer-te – Upa Lalthanchhûnga leh Upa John Lalnunthara; **Khawlailung Pastor Bialah** trainer-te – Upa Dr Lalhmachhuana, Upa C. Lalbiaksânga leh T.Upa B. Malsâwmtluanga-te an kal baw.

Korean mikhual: February 10–13, 2023 chhûng khân Rev. Dr Jinbong Kim, Director, Global Mission Leaders Forum Inc., Co-ordinator, Korean Global Mission Leaders leh Rev. Changsuk Lee, Kolkata-te chu – **Pathian hnêna thilpêka Mizoram Presbyterian Kohhran rawngbâwl dân** zir Chiang tûrin Mizoram an lo kal a, Rev. V.L. Luaia Hranleh, Executive Secretary; Rev. Dr K. Lallâwmzuala, Executive Secretary; Upa Rochungnunga, Superintendent, Synod Office; Rev. Z. John Malsâwma Colney, Secretary, Synod Partnership Committee leh Rev. Zosângliana Colney-ten lo dawngsawngin zanriah an kîlpui a. An châm chhûng hian MTC te, SMTC te, ATC te, Synod Hospital te fanpui an nih bâkah, Bûngkâwn Kohhran Biak Inah leh Dâwrpui Kohhran Biak Inahte inkhâwmpuiin, Thingsûlthliah Bial Kohhran Hmeichhe Inkhâwmpui an hmanpui baw. Dâwrpui Kohhranin buhfaithâm an buaipui dân te a hmunah an en a. Ni 13.2.2023 khân Aizâwl an chhuahsan leh ta.



KOHRAN KUM 100 TLIN LAWM

Khawlian Kohhran chuan February ni 7–15, 2023 chhûng khan an kum 100 tlin an lâwm a. Rev. Dr C. Chawngmingliana, Synod Moderator-in Centenary hriat rengna lungphun a hawng a, Centenary lawmna ruai kîl ho nghâl a ni. Khawlian Kohhranah hian chhûngkaw 106 leh dânzawhkim 400 chuang an awm mêk.

Synod Finance Committee vawi 144-na: Ni 16.2.2023 (Ningani) chawhma dâr 10 khân J.M. Lloyd Hall-ah Synod Finance Committee vawi 144-na a thu a, member 40 an kal. Committee hi Rev. Dr C. Chawngmingliana, Synod Moderator-in a kaihruai a; Rev. V.L. Luaia Hranleh, Finance Officer-in report a pe a ni. Report-ah chuan Synod Finance Committee vawi 143-na rorêl bawhzui ngaite bawhzui a nih thu te, kohhran leh Bial Treasurer Synod sum ziahna bu Financial Year thar ațanga hman theih tûra buatsaih a nih thu te, Synod Inkhâwmpui 2022-in Synod hnuai Department-te leh Field hrang hrang Auditor tûr a ruat thu te, Bial leh kohhran hrang hrangah Accounts Training neih a nih thu te leh, April 2022–January 2023 chhûnga sum dinhmun te târ lan a ni.

KTP Day: Ni 16.2.2023 (Ningani) kha KTP Day a ni a, Branch tam takin an lâwm. Synod Standing Committee, kum 1954 February ni 16-a thu chuan Provisional Committee-in KTP din a dîlna chu a pawm a. Hemi ni hi KTP din tan niah pawm a ni ta a ni. Synod Inkhâwmpui 2022 report-a a lan dânin KTP branch 891 a awm a, member 1,57,830 an awm baw (Mipa 97,542 leh hmeichhia 60,288).

Thisen pe: Ni 14.2.2023 khân Synod Hospital leh Association for Voluntary Blood Donation (AVBD) țang kawpin Valentine's Day denchenin Synod Hospital Auditorium-ah Blood Donation Camp

an buatsaih a. Mi 200 vêlin mi dangte tân an thisen an pe a ni.

PBS class tan: Presbyterian Bible School Batch 54-na, zirlai 29 lâk tharte chuan ni 13.1.2023 ațang khân class an tan a. Rev. V. Lalkima, kum 2023 chhûng atâna PBS Committee-in Contract Teacher atâna a lâkin a hna a zawm bawk.

Chhawmdâwna sem: November 2022–January 2023 chhûngin Synod Relief Fund ațangin hetiang hian chhawmdâwna sem chhuah a ni: Damlo (harsa) hnênah ₹3,12,000 leh a dangteah ₹8,96,000, a zavaiin ₹12,08,000. 'A dangte' tih hi in kâng, in chhia, harsa, accident tâwkte leh Bangladesh râltlânte an ni.

KCF enkawltu tûr: Kâwl Christian Fellowship (KCF) enkawltu tûra Synod Officers Meeting (OM)-in a ruat Rev. Lalsawichhûnga chu dah ngheh a nih hnu lawkah a thih avângin OM 4:12 of 17.2.2023 chuan March–December 2023 chhûng Kâwl Christian Fellowship enkawltu hna thawk tûrin Rev. Dr Vânlalnêma (Rev. Lalsawichhûnga u) a ruat a. Ni 12.3.2023 (Pathianni) chawhnuah Zuangtui Kohhran Biak Inah dah ngheh a ni ang.

RC leh RL pêk zât: SEC 300/Nov. 2022 leh tûn (SEC 301/Feb. 2023) inkârah hian mi 91 hnênah Revocation Certificate (R.C.) pêk a ni a, mi 116 hnênah Remarriage Licence (R.L.) pêk a ni bawk.

FG&CC: Ni 18&19.2.2023 khân West Phailêng Dinthar Pastor Bialah Kristian Chhûngkaw Seminar leh Campaign neini Rev. Lalsângbera, Director leh Upa Dêngmingthanga, Committee Member-te an kal.

Trust: Ni 17.2.2023 khân Sêrchhîpah Synod ram retaining wall en fiah tûrin Upa Thanglian khûma, AE leh Pu Lalramênga Royte, JE-te an kal a. Ni 22–24.2.2023 chhûng khân Tuithumhnârah Pastor Quarters sak tûr leh retaining wall en felin Pu Lalhriatrena, JE a kal bawk.

Synfo: Ni 24.2.2023 khân Kohhran Hmeichhe Inkhâwmpui Lian nghahna tûr Dârlâwnah pandal sak enpuin Pu David Lalruattluanga, Tv. H. Lalțanpuia leh Ni. Ngûrnunsângi-te an kal.

FG&CC: Ni 25–26.2.2023 khân Kawrthah leh Rêngdîl Pastor Bialah Kristian Chhûngkaw Campaign leh Outreach Counselling neini FG&CC counsellor-te – Rev. J. Lalremsiama, Rev. C. Lalduhawma, Rev. R.C. Lalțhavula, Rev. K. Lalniengmawia, Rev. Lalhleia, Ni. Esther Lalkhawngaih dawngkimi leh campaigner Rev. Dr K.M. Vânlalpêka-te an kal.

Synod Prison Ministry: February ni 18&19, 2023 khân Lungleiah District Jail tlawhin Rev. Lalhmuchhuaka, Director leh Counsellor-te – David Lalnunsâng a Colney leh C. Lalchhanchhuaha-te an kal.

ATC-ah DTh zir theihna tûr department pathum hawn phalsak: November ni 24&25, 2022-a Senate of Serampore College Committee chuan Aizâwl Theological College (ATC)-ah department pathum – Old Testament, Pastoral Care & Counselling leh History of Christianity-ahte Doctor of Theology (D.Th.) zir theihna hawn min phalsak.

BD zir tûr la: Ni 10.2.2023 khân Theological Education Board chuan Aizâwl Theological College-a BD (Bachelor of Divinity) zir tûr mi 27 a la.

Senate of Serampore College Committee member pathum ruat: Ni 26.11.2022 khân Senate of Serampore College Committee chuan hêng ATC zirtirtute hi kum 2023–2025 chhûnga member atân a ruat: Rev. Dr B. Lalnunzira chu Old Testament, Member, Board of Studies-ah; Dr Lalrindiki Râlte chu Social Analysis, Member, Board of Studies-ah leh Rev. Dr P.R. Hmuaka chu Research Committee Member-ah.

PPF Board Treasurer thar: Ni 3.2.2023-a PPF Board Meeting chuan Upa Rochungnunga, Superintendent, Synod Office chu Pension & Provident Fund Board Treasurer atân a ruat (PPFB 1:3).

Workshop buatsaih: Ni 13&14.2.2023 khân Synod Nursing College-in Aizâwl khawpui chhûnga Kohhran Pavalai Pâwlte pualin Nursing College Hall-ah 'Health and Legal Awareness Workshop' a buatsaih a. Kohhran Pavalai Pâwl member 130 an tel a, thupui chi hrang pariat zir ho a ni. Hei hi University hnuai National Assessment and Accreditation Council (NAAC) atâna pawimawh a ni.